

愚

齋

存

稿

愚齋存彙卷第九目錄

奏疏九

滬甯鐵路籌借英款改照粵漢美款辦法摺

開辦高等商務學堂摺

陳明南洋公學士習端正片

請給洋員福開森寶星片

展造開封河南枝路議訂合同摺

賞袍鞋料普洱茶謝 恩摺

美國商約畫押進呈約本摺

日本商約畫押進呈約本摺

請獎楊文駿片

遵旨撤換委員改建廠棧摺

賞加尙書銜謝恩摺

愚齋存稿卷第九

奏疏九

滬甯鐵路籌借英款改照粵漢美款辦法摺

光緒二十九年二月

江督張蘇撫恩會奏

奏爲滬甯鐵路籌借英款改照粵漢美款辦法增益權利訂定詳細合同恭摺具陳仰祈

聖鑒事光緒二十四年閏三月初四日承准總理衙門支電英使述其政府之意自滬至甯鐵路必欲令怡和承辦勢難峻拒飭由總公司相機籌辦

臣

宣懷遵與怡

和兼代滙豐之英國銀公司磋商草約二十五條聲明

設與地方窒礙隨時更正仍俟簽定正約會同督撫具奏電經總理衙門核准於是年閏三月二十三日先將草約簽印卽派員伴護英工司瑪禮孫等勘測軌道估計工費適英以特戰我以拳亂彼此遷延未議正約上年七月銀公司公舉前駐上海領事官璧利南來議詳細合同時局甫定所遞條款多所要挾臣等嚴詞駁斥並令仿照粵漢幹路美款辦法仍先電請外務部核奪旋接覆電飭與逐款妥商並將酌改之處電部核辦開議以來磋磨五六月易稿六七次間有爭持未允者臣宣懷復屬璧利南攜稿來甯經臣之洞覆加考核凡可

取益防損保持中國權利之處派員與之按款磋商分別駁改增刪幸皆妥商就範計訂詳細合同二十五條議借英金三百二十五萬鎊虛數九扣年息五釐五十年爲期准其分次印售金鎊小票如中國

國家有款撥給或中國紳富集資願購借款總數便應照減撥還淞滬鐵路工價後卽將已成車路暨備造滬甯全路作爲借款抵押所獲餘利銀公司得五分之一卽照舊票應分之數另給餘利憑票十二年半後每百鎊加給二鎊半隨時可將小票贖還二十五年後便照一百鎊原價取贖毋庸加給至餘利憑票年期屆滿分

給餘利卽時作廢毋庸取贖造路期內就本付息路成以後贖票拔本悉在鐵路進款支給全路訂定五年全竣設無事故逾此期限銀公司五年內應得餘利全行扣罰上海設立總管理處一所本省督撫與督辦大臣會派總辦兩員會同英員專理工程另由南洋大臣加派一員職銜相當隨時查閱帳目稟報督撫稽核洋工司祇管工程不能干預地方公事凡所建築悉應順洽華人意見尊敬中國官員借款期內不收專稅如日後中國推設各項稅捐如印花稅之類別項商務一律徵收則滬甯鐵路亦應照徵全路雙軌地畝總公司自備

仍由銀公司墊款另須購地於標界之外預備日後推展商務所必需一併加售小票總計不得逾英金二十五萬鎊年息六釐在中國應得餘利項下支給不能仍由鐵路進款支付此項加售購地小票並無年限隨時可以取贖造路購用中外材料按照西例每百給五此外別無絲毫扣用漢陽鐵廠自造料件訂明儘先購用凡遇調兵運械振饑各事照核定車價減半給發儘先載運侵礙中國主權概不得經由此路正約簽定草約作廢十二箇月不興工卽將正約註銷中國祇認英國銀公司不准轉與他國及他國之人民各等語臣等伏

查江省沃衍饒富物產豐腴雖藉江海以轉輸究慮外
氛之阻遏自盧漢粵漢津鎮各路相繼定議西北供億
取給東南察度軍政商情滙甯接軫勢難再緩此次磋
議借款雖以粵漢美款辦法爲基址其自保權利之處
實較已定各路爲尤多殫竭思無可再議璧利南電
致英京一切俱已允協理合先繕具清單恭呈

御覽俟奉

旨批准再行簽印卽由

臣

之洞

臣

恩壽等會同

臣

宣懷

遴派大員切實興辦以冀仰副

朝廷陔懷南服慎重路工之至意所有詳訂滙甯鐵路

借款合同緣由謹合詞恭摺具陳伏乞

皇太后

皇上聖鑒訓示謹

奏 本月二十七日奉

硃批外務部議奏單併發欽此

開辦高等商務學堂摺

光緒二十九年八月

奏爲南洋公學開辦高等商務學堂以造人材而備實用恭摺具陳仰祈

聖鑒事竊

臣

於光緒二十八年九月十七日奏請將南

洋公學定爲高等公學堂聲明公學分設之目曰上院視西國專門學校肄習政治經濟法律諸科曰中院視西國中學校肄習中西文普通學曰商務學堂當以中院畢業學生遞年升入另延教習分門教授以備將來權稅興商之用奉

硃批管學大臣議奏欽此當經管學大臣吏部尙書張

百熙附片奏明請俟調查公學章程及學生功課詳加考察再行議奏奉

旨知道了欽此欽遵恭錄並查原片咨行查照在案伏讀

上諭飭令各直省設立學堂復於

京師舉辦大學堂

欽定章程頒行天下各省承流仰化次第舉行或講政治或習藝學或設水陸武備農工等學堂皆已漸有端緒因念上海爲商埠總匯之區商學尤爲當今切要之務臣擬於南洋公學設立商務學堂業於光緒二十七

年十二月附片奏奉

俞旨先經派委前充公學總教習之洋員福開森赴各國考察規範並咨請出使大臣購覓商律諸書先後寄到已將東西洋高等商業學校章程詳細繙譯藉資倣辦竊考商務學堂以法德爲巨擘以奧國爲最早大率開辦已逾百年而近三十年來尤加意講求務臻美備瑞士比利時兩國在歐洲幅員不廣最重商務故商校林立商材蔚興英美兩國商務稱盛近因與各國競爭互相比較數年以來多設學堂肄業專門商學日本高等商業學校開辦至今未及二十年直轄於文部省諸

生學業成效卓著足供商部海關銀行職事溯其創始率由公司商會集資開辦而政府爲之扶助文部爲之核定其高等課程則有商律財政商業歷史輿地物理化學算數簿記書札又有機器學以究工藝商品學以辨物產游歷考察以求實驗而廣見聞及其學之成則上備商部海關之選次爲管理銀行商船電報鐵路礦務之材並充公使領事商務隨員之用其各國語言文字以英文爲要而法德等國次之其肄業學生則由中學堂普通畢業或由尋常商業學校遞升而入此其辦法大畧情形也論者謂泰西以商立國而不知其講求

商學具有本原其以商戰勝人縱橫五洲殆有由致臣
自光緒二十六年十一月奉會辦商務大臣之
命卽奏請廣商學以植其材聯商會以通其氣定專律
以維商市興農工以濬商源特開曹部以振起商戰足
國足民近雖以憂銷差荷蒙

聖慈仍飭隨同辦理商約與各國專使會議每當利權
出入無不斷斷與爭各專使等固不免恃强要素有進
無止要其推勘精細查考詳明實具有本之學今值
朝廷垂念商務關係重要

特派大員訂定商律茲復奉

旨設立商部仰見

聖明規畫久遠胥關富强大計莫名欽服夫時局旣以商務爲亟而商學尤以儲材爲先現在各省設立高等學堂考求政藝不患無人獨商學專門未開風氣竊惟南洋公學款由商捐地在商埠若統稱高等則與省會學堂不甚分別且亦無所附麗今年春夏間臣在京時面與管學大臣張百熙再三晤商仍擬查照臣上年原奏卽就南洋公學上院專設高等商務學堂該大臣頗趨臣言催令速辦抵滬以後酌采各國章程延訂外洋教習查有本年中院畢業學生於中西普通之學具有

門徑擬令遞升俾習商務按之程度與各國中學遞升相符考之功課與高等商校教法相合可否仰懇

天恩俯念南洋公學創辦較早學生普通畢業最先及今進習商學收效亦稍速准將公學上院作爲高等商務學堂將來各該生等學業有成准由臣督同該學堂中西專門教習分科攷驗酌給憑照並咨明管學大臣商部禮部遵照

欽定大學堂章程與各省會高等學堂一律頒給出身文憑以勸實業而示鼓勵如蒙

俞允

臣

當慎重督課以儲商材斷不敢徒託空言致滋

流弊所有南洋公學擬請定爲高等商務學堂緣由理
合恭摺具陳伏乞

皇太后

皇上聖鑒訓示謹

奏 本月二十日奉

硃批管學大臣議奏欽此

陳明南洋公學士習端正片

光緒二十九年八月

再上海通商口岸事雜言龐少年子弟血氣未定往往惑於詖辭邪說囂然不靖臣開辦南洋公學卽以激發忠愛開通知慧振興實業爲主義每見該學堂辦事人員中西教習及各班學生等諄諄告誡申明章程卽偶有教習稍染習氣學生稍軼範圍者立卽辭退開除從不瞻徇遷就現派四品銜直隸候補知縣張美翊總理堂務該員曾隨薛福成出洋有年留心西學而力主正派本年上海報館流言士氣橫雜該員訓迪諸生不爲誘惑尤所難能閏五月中院學生行畢業禮臣邀同商

約大臣呂海寰伍廷芳電政大臣吳重熹蒞堂給獎見
各該生等班序整齊儀文簡肅絕無矜張之惡習臣等
再三獎誡勉以謹遵

諭旨端正趨向以期造就通材竊念南洋公學欸由商
捐事經官辦本與私立學堂家自爲說人自爲學者迥
不相同臣仍當隨時隨事申誡督課以端學派而勵人
材且現擬講求商學屏絕空談專研實業當無流弊堪
慰

宸厪理合附片具陳伏乞

聖鑒訓示謹

奏 本月二十日奉

硃批知道了欽此

請給洋員福開森寶星片

光緒二十九年八月

再南洋公學總教習美國洋員福開森於創辦時督造工程訂定功課深資擘畫上年臣與前兩江督臣劉坤一派赴泰西考究商學本年湖廣督臣張之洞又派令繙譯礦務章程該洋員中西學問貫通不僅於南洋公學訓迪有功光緒二十六年保護東南該洋員隨同臣與升任蘇松太道余聯沅與各國領事晝夜籌畫頗資臂助先經劉坤一以辦理交涉奏保

賞給三品頂戴在案現值中院學生畢業遞開上院能使商務學生有所取材臣不敢沒其微勞查外務部所

頒章程凡總教習出力准給二等第三寶星原爲鄭重教育起見合無仰懇

天恩准將三品頂戴總教習洋員福開森賞給寶星以示優異而獎勤勞除咨外務部查照外謹附片具陳伏乞

聖鑒訓示謹

奏 本月二十日奉

硃批著照所請外務部知道欽此

展造開封河南枝路議訂合同摺

光緒二十九年八月
豫撫陳會奏

奏爲盧漢鐵路展造開封河南兩府枝路與比國公司
議訂合同磋商就緒恭摺仰祈

聖鑒事竊查盧漢鐵路係貸借比國公司洋款造辦前
因豫籌幹路還款保全枝路利益臣宣懷於光緒二十
五年十月奏請將開封河南兩府枝路統歸總公司籌
款接造欽奉

硃批著照所請該衙門知道欽此欽遵在案先據比國
公司代理人盧法爾函請承辦當經派員伴護勘測大
概旋因拳匪事起暫行停議去冬盧法爾來滬重申前

請並承准外務部咨催辦理自應從速興辦查盧漢鐵路在滎澤左近渡河該處東至開封府約一百七十里西至河南府約二百五十里現由盧法爾估計應借工款一百萬鎊約合法金二千五百萬佛郎克議明利息期限悉照盧漢章程俟合同簽定後九個月內開辦所有議訂合同各條飭由總公司法文參贊候選道柯鴻年等與盧法爾數月磋商並經臣宣懷逐條斟酌照盧漢合同量爲刪汰閏五月間臣夔龍入都過滬互相商榷復經函呈外務部詳加增改旋准電復酌添二節計訂定細目二十九條又行車合同十條要以保持權利

不令旁生枝節爲斷此次所訂合同大致以盧漢幹路
辦法爲基址而酌量增刪鉤勒較爲嚴緊除咨呈外務
部外理合將所擬比國公司合同底稿繕具清單恭呈
御覽俟奉

旨批准再行簽印開辦所有盧漢鐵路擬築開封河南
兩府枝路與比國公司議訂合同緣由臣等謹合詞恭
摺具

奏伏乞

皇太后

皇上聖鑒訓示謹

奏 本月二十日奉

硃批外務部覈議具奏單二件併發欽此

賞袍褂料普洱茶謝

恩摺

光緒二十九年八月

奏爲恭謝

天恩仰祈

聖鑒事竊

臣

於光緒二十九年八月初六日接准京電

仰蒙

恩賞江綢袍褂料普洱茶等件到

臣

謹卽恭設香案

望

闕叩頭謝

恩祇領伏念

臣

猥以疏庸頻叨

寵遇時當午夏曾邀

中禁之榮頒節屆酉秋復荷

上方之珍賜自

天錫賚伏地慙惶欽維

撫序凝釐

順時行賞

藻火潤彰施之色

德懋垂裳醴泉呈瑞應之圖

孝隆菲飲奄八方而被福合百爾以含和

臣

腰經未除

悚章身之有耀頭綱乍試願盪穢於至清覩茲衣食之
常珍益軫絲茶之大利服之無斁思日贊

文經武緯之謨味可回甘更長沐

堯醲

舜醇之化所有

微臣

感激下忱理合繕摺叩謝

天恩伏乞

皇太后

皇上聖鑒謹

奏

九月

日奉

硃批知道了欽此

愚齋存稿

卷九

奏疏九

十五

思補樓藏版

美國商約畫押進呈約本摺光緒二十九年九月直督袁鄂督張商約大臣呂

伍會奏

奏爲美國商約定議遵

旨畫押謹將約本恭摺

進呈仰祈

聖鑒事竊

臣

海寰

臣

宣懷於上年八月英約辦竣後准

美使康格古納希孟等開送約款四十條訂期在上海

開議當經鈔寄

臣

之洞暨前兩江總督

臣

劉坤一公同

酌核查前二十七條均係舊約所有修改字句末後兩條爲立約應有之款其第二十八條至三十八條係屬

新增而無加稅免釐款文在內詰問該使據稱未經奉
有美廷訓條應俟隨後再商康格於交送約款後旋即
入都訂明由古納希孟與臣海寰等會議因將新增十
一條先行商酌議未及半適前督臣劉坤一因病出缺
臣宣懷亦丁憂卸差美使遂暫行停議嗣臣世凱臣廷
芳奉

旨會議迭催該使總以前議各款請示美廷俟接訓條
再議爲詞延宕至四閱月之久至本年二月甫行接議
該使謂續奉美廷訓示令將修改舊約各條仍前照行
其所增者重定爲十六款比照英約辦法作爲通商續

約請將前送約文四十條撤銷臣等詳加覆核加稅免
釐一款雖已列入而議定賠款還銀一條忽又刪去卽
與力爭該使以美國於賠款還銀一事已照和約辦理
簽字債票毋庸再入商約所言尙屬實情自未便故事
強求其所開第三款之第二節係聲明保教

諭旨當駁以和約業經載入不便再列商約之內又海
關稅司一款須歸中國自主不能入約允其咨呈外務
部飭令總稅務司酌量錄用又利益均霑一款擬索其
報施一律藉爲日後弛禁華工地步彼堅執不允遂商
將以上各款一併刪除并將英約所有之治外法權暨

禁止莫啡鴉兩款援照列入祇此議增議刪已辯論數月之久適臣宣懷在保定復奉會議之

命遵卽馳回滬上協力妥籌又磋商三月有餘然後就範釐定約款十七條大致與英約相同而其中得失損益稍有區別第一款曰駐使體制美使原送約文聲明駐使可以行文各省將軍督撫駐紮大臣駁以美國向由外部轉行中國亦係由外務部咨轉不能兩歧駁令刪去改爲中國駐使爲美國優待是以美使駐京中國亦一律優待以昭平允第二款曰領事權限報施一如駐使而聲明美國領事按例妥派外務部按照公例認

許如所派不妥或與公例不合我卽可不認冀以挽回主權第三款曰口岸利益此係查照日本舊約不能不許因卽比照日約核改妥協第四款曰加稅免釐此爲全約主腦美使初祇允加至值百抽十并請我裁內地常關又不提明銷場出廠等稅以爲中國主權所係不欲有所干礙立意堅執屢費磋商舌敝唇焦動至決裂臣等往復電酌合謀抗拒不遺餘力該使始允加至十二五其所裁內地常關之稅任我改抽出產稅以爲抵補竊思內地常關不過十餘處各省土貨未必悉所經由按照英約載明進出口貨加稅後均得全免重徵則

內地常關亦祇能徵土貨運出第一道之二五半稅若非第一常關則并無稅可收至土貨未經第一常關徵過二五半稅者出口時仍須徵足七五之數是常關雖裁亦無大礙今旣任我改抽出產稅則從源頭處抽收較無遺漏似更合算當時尙以與英約兩歧爲慮該使自認將來勸英照辦祇得允裁至於銷場稅出廠稅及議增之出產稅美使雖不願詳載名目而於專條中聲叙本款所載各節毫無干礙中國主權徵抽他等稅項之意以渾括銷場等稅保我主權第五款曰稅則附表彼請美國人在中國輸納稅項較最優待之國不得加

重另徵^臣等案其增入中國人民在美國納稅亦如之一節第六款曰准設關棧係照英約酌辦第七款曰振興礦務前半悉照英約彼請准美國人遵章開辦礦務此本路礦衙門定章所許因訂明美國人民辦理礦務居住之事應彼此會定章程以資鈐束第八款曰存票抵稅第九款曰保護商標均與英約意義相等而於存票款中聲明除去船鈔一項以補英約所未及第十款曰創製專照此款深慮有礙中國工藝仿造駁論再三改爲俟中國設立專管衙門定有創製專律後再予保護其權仍自我操第十一款曰保護版權卽中國書籍

翻刻必究之意與之訂明若係美文由中國自繙華文可聽刊印售賣並中美人民所著書籍報紙等件有礙中國治安者應各按律例懲辦爲杜漸防微之計第十二款曰內港行輪前兩節照英約大意聲明嗣後無論何時修改應由我查看酌辦末節如奉天府安東縣開埠事扼定自開而辦法略有變通第十三款曰改定國幣將英約所附照會納稅仍照關平一節增入款末第十四款曰輯睦民教將教民犯法不得因入教免究並應遵納例定捐稅教士不得干預中國官員治理華民之權詳晰列明冀資補救第十五款曰治外法權第十

六款曰禁止莫啡鴉皆我索其增添與英約一律第十
七款曰修約換約期限係照立約通例復於約款之外
另訂附件三端一爲內地徵抽鴉片鹽飭稅捐之事及
保全稅捐防範走漏之法均仍由中國政府自行辦理
二爲所留通商口岸之常關設立分關保持稅餉三爲
申明第五款所載稅則附表卽前定切實值百抽五之
稅則至內地常關雖裁並不藉此以裁北京崇文門並
各城門及左右翼等處之稅由美使備一照會存案又
第四款不礙徵抽他等稅項一語尙涉籠統由我備一
照會聲明他等稅項卽係包括銷場出廠及改抽之出

產各稅應仍聽中國自行辦理彼亦復一照會言明彼此意見相同以上附件照會分別簽押蓋印彙入約本綜計約款十七附件三照會三均經隨時電達外務部核准代爲

進呈此_臣等先後籌議美約之情形也伏思各國修改商約無非佔我利益美方極力見好謂事事不侵我主權而其取益防損心計甚工究未嘗放鬆一步彼有所益卽我有所損不得不堅爲維持溯自開議以來京外互酌電牘頻仍務在眾論僉同期無流弊常有一字一句彼此推究改至數次而未已復折衷於外務部始敢

作准會議至六十四次歷時幾及一年辯論不下數十萬語臣等才疏識淺抵制無方惟勉効愚忱冀爭得一分卽獲一分之益今幸和衷商榷得以圖成業於八月定議之後由臣海寰等會電具奏奉

旨著派呂海寰等就近畫押欽此遵卽繕備漢文約本二分其英文約本係照臣廷芳未入都之先與美使核定原本由美使印備二分於八月十八日遵

旨在上海會同畫押彼此各執漢英文一分美使並以臣廷芳旣已回京約內不便列銜臣海寰等初與爭持

迨電奉外務部復准始行照辦所有美約議竣遵

旨畫押各緣由理合合詞恭摺具報並將約本漢文英文各一分派委道員楊文駿賁送入京交由軍機處進呈

御覽伏乞

皇太后

皇上聖鑒訓示謹

奏 十一月十六日奉

硃批外務部知道約本併發欽此

日本商約畫押進呈約本摺

光緒二十九年九月直督袁鄂督張商約大臣呂

伍會奏

奏爲日本商約定議遵

旨畫押謹將約本恭摺

進呈仰祈

聖鑒事竊查日本商約於上年五月間卽准日使日置

益小田切萬壽之助開送約款十三條索我在滬開議

維時英約尙未完竣

臣

海寰

臣

宣懷雖與會議數次彼

此均以英約未定不便深議一面將所送條款電商

臣

之洞暨前兩江督

臣

劉坤一並秉承外務部以定准駁

迨英約歲事後始與該日使逐款辯論

臣

等往返會商

准駁宗旨僉以抱定英約爲主凡英約所有者自應均照英約辦理不能絲毫有異英索而我未允者仍不能

稍予遷就嗣

臣

世凱

臣

廷芳奉

旨會議意見亦復相同當以日約第一第二兩款爲加稅免釐一事既不能照英約加至十二五而僅允值百抽十並欲將由日本運進中國之煤炭棉紗及一切棉貨概不加稅尤與英約相背按日本進口貨物以此爲大宗不得不亟與爭論每議必幾於決裂而後已從未敢稍予鬆勁是以議經數月之久相持莫定僅將第三

款川江設施拖纜第四款內港行輪及脩補章程第七款中日商民合股經營第八款保護商牌第九款改定國幣均爲英約所有與之妥擬款文字句較英約稍有增改而意義尙無出入惟於商牌款內議增保護版權一事內港行輪款後議增照會聲明往來煙台東三省輪船亦係照內港章程辦理因據總稅務司查復日本小輪在該處行駛已久礙難駁拒此外第五款索開各處口岸第六款口岸城鎮任便居住第九款第二節整飭度量權衡第十款請運米穀出口均駁拒未允城鎮任便居住一事辯論尤多並用照會分晰城鎮二字之

義在案其第十一第十二第十三等款爲條約通例亦
尙未與議及彼見我堅持不下遂變計將擬定各款卽
作爲定議迫我畫押臣等見日使如此辦法爲各國從
來所無公同商酌惟有嚴詞拒絕遂於三月間暫行停
止允俟美約定後再議此臣等在滬議而未定之情形
也迨臣之洞應

召入都旋奉

旨各國商約著卽在京開議等因臣海寰等欽遵照會
日使據該使以奉其外務大臣回電商約議結在邇不
必易地仍在上海續議卽經電達外務部適日本駐使

內田康哉赴部晤商欲提出北京開埠加稅免釐米穀
出口三條由伊在京與臣之洞面議餘仍歸滬定外務
部答以無論在京在滬不能兩處分議臣海寰等卽未
再與日使會議專由臣之洞與內田駐使在京商辦磋
磨三月餘之久各款牽連並議與之言明允則俱允翻
則俱翻以期一氣呵成每一款字句彼此時有斟酌更
改大致仍宗原議及臣海寰等平日持論之意均將約
文錄呈外務部核准計釐定約款十三附件七第一款
曰加稅免釐彼雖未明允訂實加稅至十二五而聲明
日本政府允認按照中國與有約各國共同商定加稅

之率一律照輸無異並聲明所有中國徵收出產銷場
出廠以及土藥鹽觔等稅亦悉照各國與中國商定辦
法無稍歧異明知日本意存取巧不肯顯然承認將來
從違仍視各國祇以此款在滬屢議不諧彼既藉此轉
圜臣之洞核與英美各約載明俟各國照允方能舉行
用意亦復相等是以照允第二款曰川江設施拖纜第
三款曰內港行輪均查照滬擬增改字句第四款曰中
日商民合股經營悉照滬擬原文第五款曰保護商牌
版權亦照滬擬而索其增添查禁違礙書報一節文義
均照美約比擬第六款曰改定國幣照滬擬而刪改後

段與美約相同第七款曰整飭度量權衡因有益於中國商民可除積弊是以許其入約第八款曰脩補內港行輪章程照滬擬並無增易第九款曰利益均霑雖屬立約通例將字句妥爲更改並索其增入中國人民在日本者亦極力優待一節以合報施之義第十款曰開埠通商因彼索開北京爲通商場其意甚堅臣之洞卽以俟各國全撤護路護館兵隊爲抵制如各國兵隊一日未撤北京商場亦一日不開彼又索開長沙府爲口岸此係英約已有不能不允卽查照英約聲敘而刪去原索之常德府等九處口岸又索開

盛京之奉天府大東溝兩處爲商埠美約旣已允開曰約遂亦照辦雖美索安東縣日索大東溝爲稍異其實相距不遠無關輕重故允之第十一款曰治外法權係照英約向其索添第十二款曰約文以英文爲准第十三款曰互換日期均屬立約例有之條至第一附件爲英約所有之內港行輪脩補章程第二第三附件爲聲明往來煙台東三省輪船亦照內港章程辦理往復照會第四第五附件爲聲請通行照原定內港行輪章程派員統收稅釐各辦法往復照會第六第七附件爲預定北京開通商場各辦法往復照會除加稅一款照各

國一律外計我於英約之外所索允者二事中國人民
在日本者極力優待一款查禁違礙書報一款駁辯刪
去者三事請運米穀出口一款口岸城鎮任便居住一
款常德府等九處口岸一款以索允爲抵制者一事各
國護館護路兵隊全撤後北京方能開埠一款其間中
國人民優待一條北京撤兵再行通商一款似均於國
體頗有關繫臣之洞於定議後據內田駐使訂明須與
美約同日畫押卽經電致臣海寰等趕備漢文約本並
與日使在滬校譯日本文英文另備約款附件呈由軍
機處代

奏奉

旨著派呂海寰等就近畫押欽此

臣

海寰

臣

宣懷以爲

期甚促與日使商訂先畫漢文將來繙譯東英文務照原定漢文意義不得稍有歧異卽繕備漢文約本兩分遵於八月十八日在上海會同日使畫押

臣

廷芳已先期奉

命回京日使允由

臣

海寰代畫當卽遴派隨辦商約熟

諳中英文之洋員戴樂爾福開森郎中李維格道員梁瀾勲熟諳東文之譯員馮國勲與日使在滬公同較譯東英各文日使並請添派道員楊文駿審定漢文字義

其英文譯就後復電經

臣

廷芳核覆始作定本再交日

使印備東英約文各二分於九月十一日補畫仍書八

月十八日之期此

臣

等在京定議在滬畫押之情形也

臣

等竊惟此次修改商約在各國之意本專爲損我以

益彼望甚奢而意甚堅且日本議約在英美之後凡英

美所索允者彼視爲分所應得英美所索而未允者彼

則以爲該國體面所關必須多索數條方見其改約之

功被執定此見更覺難於辯論是以開議經年棘手萬

分

臣

等始終堅持定見凡有損於我者在京在滬在津

皆始終力拒全力爭持不敢稍涉鬆勁幸彼爭辯年餘

知我不能搖奪且急欲與美約同日畫押遂卽轉圜事
事略爲遷就得以議成其中但有稍可爭回權利謹防
流弊顧存國體之處無不竭力挽救分別增刪尙未於
英美兩約之外別有受損之事此則臣等同此愚衷當
蒙

聖明俯鑒者也所有日本商約告竣遵

旨畫押各緣由理合詞恭摺具報並將約本漢文日
本文英文各一分派委道員楊文駿齎送入京交由軍
機處

進呈

御覽伏乞

皇太后

皇上聖鑒訓示謹

奏 十一月十六日奉

硃批外務部知道約本併發欽此

請獎楊文駿片

光緒二十九年九月
商約大臣呂伍會奏

直督袁鄂督張

再軍機處存記前廣東雷瓊道楊文駿自

奏調來滬隨辦商約兩年以來悉心贊畫智周慮密

臣

等深資臂助其辯論精詳卽英美日各使亦稱其能現
在三國條約已先後告成該員克慎克勤始終其事文

牘尤賴一手經理實屬勞瘁異常

臣

等查該員才識練

達器局閱通歷宰繁區賢能夙著洊任海疆道員要缺

措置均甚裕如庚子年北方匪亂東南各省會商保護

該員隨同

臣

宣懷在滬辦理多所建議悉合機宜適全

權大臣前大學士李鴻章道出滬上嘉其智謀隨帶入

京議約該員不避艱險毅然隨行和議有成頗著勞勩
經慶親王奕劻保奏仰蒙

特旨交軍機處存記是該員之材堪任使早在

聖鑒之中方今時局日艱需材孔亟而交涉繁重尤冀
得人該員久在上海辦事歷練甚深於各國洋務商情
備知窾要若畀以海疆要區必能勝任茲派令齎約入
都可否仰懇

天恩准飭該員預備

召見恭候

聖明垂察量子擢用出自

逾格鴻施臣等爲人材難得起見謹合詞附片密陳伏
乞

聖鑒謹

奏

遵

旨撤換委員改建廠棧摺

光緒二十九年十一月
商務大臣張會奏

奏爲遵

旨覆陳恭摺仰祈

聖鑒事竊

臣

等承准軍機大臣字寄光緒二十九年五

月十四日

上諭御史潘慶瀾奏叅鐵路委員驅迫商民一摺據稱
西河沿一帶商賈會萃盧漢鐵路需建廠房迫令徙讓
商民惶惑請飭另行擇地建廠等語鐵路需建廠屋豈
容強佔商業繁盛之區著張之洞盛宣懷另行擇地建
造以順輿情委員鄭清濂辦理不善並著查明撤換原

摺著鈔給閱看將此各諭令知之等因欽此伏查盧漢
車站在前門城外應設車廠貨棧並委員辦公之所該
處靠城臨河地基窄狹不敷展布比法總工程司擬援
照京榆車站在東河沿展拓局廠成案就西河沿一帶
空地設法購辦經委員道員鄭清濂稟由臣宣懷與五
城御史一再互商總以體順羣情爲不易辦法不特不
敢出於強佔卽商民稍有未願亦未遽以官法相繩函
牘具在皆可復按該委員鄭清濂向來辦事尙稱妥愼
此次議建局廠若謂其從中漁利可以信其必無惟派
工勘測雖無迫抑情事辦理究有未洽臣等謹已遵

旨將候選道鄭清謙撤去行車監督差使另派委員接辦並飭將應設車棧貨厰另行擇地改建以仰副

朝廷保商衛民之至意惟是各項厰棧局所皆與車站相爲維繫厰棧移置遠地車機之修儲客貨之上下已覺多形不便尙堪勉強圖維至所需辦公之所一切稽查彈壓事宜胥係於此若與車站相距較遠呼應不靈貽誤匪淺再四籌思舍車站左近別無相宜之處擬仍在西河沿一帶酌擇空地購建路局房屋一所以資辦公此項公所用地甚少萬不至有礙市面應由臣等責成接辦之員會商五城御史曉諭該地面業戶加給價

值妥爲購買斷不准稍有抑勒以順輿情所有遵

旨撤換委員改建廠棧並酌設公所緣由是否有當謹
合詞恭摺具陳伏乞

皇太后

皇上聖鑒訓示再此案因往返函商有需時日是以覆
奏稍遲合併聲明謹

奏 本月二十八日奉

硃批知道了欽此

賞加尙書銜謝

恩摺

光緒二十九年十一月

奏爲恭謝

天恩仰祈

聖鑒事竊

臣

於本年十一月十六日承准吏部咨開光

緒二十九年八月二十七日准軍機處交出軍機大臣
面奉

諭旨盛宣懷著賞加尙書銜欽此當卽恭設香案望

闕叩頭謝

恩感悚之餘莫名踧踖伏念

臣

資材駑下地望單微叨

荷

生成至優極渥藿葵嚮日聊抒獻曝之誠槐棘趨風藉
展近

光之願願此涓埃之稍盡本無績效之可言猥蒙

聖慈俯加甄敘

寵以六卿之長喉舌是司躋諸九列之尊頭銜用錫懔
建官於周典稽錄事於漢曹自分迂庸愧茲崇秩臣惟
有恪承

申命益矢寅恭臺省遙瞻共仰

乘乾於日月樞機倍愼敢忘曳履於星辰所有微臣感

激下忱理合繕摺叩謝

天恩伏乞

皇太后

皇上聖鑒謹

奏 十二月初九日奉

硃批知道了欽此

思齋存稿卷第九

愚齋存彙卷第十目錄

奏疏十

密陳大計摺

請給日員寶星摺

覆陳黃河造橋河防並無窒礙摺

賞袍袷料普洱茶謝 恩摺

賞壽字如意蟒袍佩件謝 恩摺

葡國商約畫押進呈約本摺

俄義丹法瑞葡稅則續行畫押片

日本贈送寶星應否收受請 旨片

廣澳鐵路議訂中葡合同摺

奏調李經方片

賞袍袷料普洱茶謝恩摺

愚齋存彙卷第十

奏疏十

密陳大計摺

光緒三十年正月
端商約大臣呂會奏

江督魏粵督岑鄂督

奏爲密陳大計恭摺仰祈

聖鑒事竊維日俄交戰議者紛紛

朝廷深維國勢重恤民艱降中立之

詔守局外之例權宜應變具仰

睿謨惟默觀近日時局岌岌可危有非中立所能避免

者

臣等受

恩深重不敢不爲

皇太后

皇上密陳之韓國先我宣布中立繼日兵進佔漢城與韓訂立六款無異取爲附庸日皇宣戰敕諭有言維持遠東永久之平和不妨礙他國權利利益之政策異日戰勝其視東三省之權利利益與韓之權利利益庸有間乎猶憶甲午之役日已席捲遼東俄與德法出而爭之加與賠款還我領地遂以三省鐵路旅大兩海口爲俄酬謝當日俄與我盟約答我國書及布告諸國皆言不損礙我土地主權曾幾何時盡食前言蓋霸國舉動專尙勢力不尙信義自古皆然此次戰後無論孰勝皆

糜費萬萬流血所得之地恐將以東省不在局外中國
已棄置不顧俄可謂得之於日日更可謂得之於俄而
非得之於我也俄勝固明目張膽不爲我有復有何說
向之索還此猶就一隅言之至於全局日本而敗則白
種愈驕東亞瀕危歐洲列強各謀私利日已見絀我更
何堪若俄竟不支則洩憤取償皆意中事新疆蒙古在
在可危而日於東省派兵代守權力所至何異虎去狼
來是兩國無論勝敗誰屬皆於我有極大關係者也欲
避其害惟有乘其勝敗未分之際及早圖維預佔地步
日俄之戰關係全球勝敗既分各國必出而干預查西

歷一千八百十四年維也納大會一千八百五十六年
巴黎大會一千八百七十八年柏林大會其始皆二三
國之爭端而其後率變爲列強之交涉今各國注重遠
東或將乘此機會援例踵行安籌均勢我若祇顧目前
以中立爲已足或僅以空言照會駐使不能與諸國政
府直商辦法則將來各國開會之日恐被屏居局外旣
居局外他人無論如何逼處我惟有聽受之責而無駁
詰之權禍變之來何堪設想美國政府今方以保全我
國土地主權布告各國似未始非一好音然以己之土
地而待他人爲之保全則其土地已難自存己之主權

而待他人爲之保全則其主權必多旁落試觀膠旅威
廣諸地未經佔據之前各國何嘗不力陳此說以相慰
藉及既有事所行盡反所言至俄在東省陽稱睦誼陰
肆狡謀覆轍匪遙尤爲殷鑒卽日韓新約亦何嘗不以
保全土地主權爲言而實去名存何以立國蓋強之遇
弱往往以甘言巧語漫爲餌弄沈溺其志迷亂其識以
徐逞其和平侵佔之圖弱國於此若不猛省奮發機勢
一失無可挽回外鑒高麗內觀膠旅成事俱在不可諱
也然彼旣以是爲言我卽可據爲口實起而相持況古
今中外列強相競之時代以兵戎始者必以會盟終今

俄日之役全球耳目聚集東隅各有相關之利害異時
開會各肆所欲將以我國償其無厭之求後患方殷殆
有不止於東三省者臣等愚見似宜乘彼布告之後迅
速

特簡親重大臣以考求新政爲名厯聘歐美有約諸邦
面遞

國書以維均之勢立說東三省開通商埠利益均霑爲
宗旨懇派使臣設會評議其中要義約有數端一俄國
退兵本有約期近訂美日兩國商約有中國特允開設
商埠數處之明文是東三省爲我主權所在外國亦經

承認不得誤認東三省爲中國已失之地二俄日兵連禍結牽動全球有損商務中國特請各國調停早令息戰以保和平東三省一帶人民財產經緣日兵隊蹂躪應如何撫循償恤之處亦應議及三請以中國北京爲各使會商之地四會議既定戰事既息中國允以東三省徧開商埠及廠棧路礦諸項利益以爲酬勞惟公同認定於中國土地主權不得稍有妨礙此一會也在中國保三省卽所以爲保衛全國土地之謀在諸邦保中國卽所以爲永保東方太平之策一面擇最大新政切實舉行數事痛除舊習以動天下之觀聽各國見我真

有發憤自強之意或可信我所言雖未必定在北京由我執牛耳但不會則已會則發端自我彼時必能預占一席然後隨事補救抵制斡旋消息既較靈通辦法尙可布置失此不圖後悔無及昔土耳其爲俄所迫英法諸國助之敵俄厥後列邦開會柏林土國遣使預議甫發一言遽遭訶斥論者謂土於此會不先自籌定辦法徒俯首聽命致喪權利實乏先事之謀鑒彼前車私爲惴惴臣等睹茲時局寢食俱廢處此萬難之際勉竭一得之愚往返電商意見相同用敢合詞披瀝密陳是否有當伏乞

皇太后

皇上聖鑒訓示施行謹

奏二月初五日奉

旨留中

請給日員寶星摺

光緒三十年五月
商約大臣呂會奏

直督袁鄂督張

奏爲中日商約辦竣請

旨賞給日員寶星以篤邦交恭摺仰祈

聖鑒事前因中日新訂通商條約定議後日本駐滬總

領事小田切萬壽之助向

臣海寰

臣宣懷面稱此次新

訂條約中日辦事各員彼此均應各贈寶星以昭睦誼

並云已將

臣

等銜名開報本國兼索開隨員名單

臣海

寰等當經電請外務部核示奉到部覆日本擬贈議約

各員寶星可將銜名開送彼如開送銜名亦當一體請

賞寶星旋據該總領事將本國在事各員開送二十名

函請照單奏

獎以彰勞績等因

臣海寰

臣宣懷亦卽將在滬隨辦華

洋各員斟酌開送十員今年二月間又據該總領事將前送名單改獎等第並添送一名函請辦理前來當經

臣

海寰等電達外務部查核旋准外務部覆電核與定

章相符均可照准事關商約應由上海具奏以免周折等語前月又據該總領事面稱中國在事各員已由本國外務省奏准給予寶星并詢中國給予日員寶星是否照准意甚懇切竊思頒給勳章各國視爲隆重之典溯查光緒七年間續修俄約已定經總理衙門奏請分

別賞給各國駐京大臣寶星並釐定等第酌擬章程又
光緒二十三年總理衙門具奏酌改寶星式樣均奉

旨允准疊經頒給在案今日本既以寶星贈中國各員
自不能不轉爲酬贈以盡報施之誼謹將日本總領事
先後函送員名等第清單彙總照錄恭呈

御覽可否照單

賞給寶星之處出自

聖裁如蒙

俞允卽請

飭下外務部照式製就交由

臣

海寰

臣

宣懷轉送駐滬

日本總領事祇領遞寄所有

臣等請

賞日員寶星緣由理合會同直隸總督

臣

袁世凱湖廣

總督

臣

張之洞恭摺具陳伏乞

皇太后

皇上聖鑒訓示謹

奏 五月 日奉

硃批著照所請該部知道單併發欽此

謹將日本總領事開送各員銜名擬請寶星等第清單

錄呈

御覽

計開

外務次官珍田捨己

以上一員擬請

賞給頭等第三寶星

外務省通商局長杉村濬

公使館一等書記官松井慶四郎

外務書記官鍋島桂次郎

外務省政務局長山座圓次郎

總領事小田切萬壽之助

外務書記官石井菊次郎

以上六員擬請

賞給二等第一寶星

公使館二等書記官鄭永邦

以上一員擬請

賞給二等第二寶星

大藏省鑑定官山岡次郎

外務省繙譯官齋藤祥三郎

外務書記官兼外務大臣祕書官本多熊太郎

外務省參事官倉知鐵吉

公使館二等通譯官高洲太助

以上五員擬請

賞給二等第三寶星

領事官補芳澤謙吉

以上一員擬請

賞給三等第一寶星

外務通譯生井原眞澄

大藏省鑑定官補阪口武之助

外務書記生深澤暹

外務屬宮內元

外務書記生中畑榮

外務省繙譯官補小川善次郎

外務屬石氏章作

以上七員擬請

賞給三等第二寶星

覆陳黃河造橋河防並無窒礙摺

光緒三十年六月
直督袁鄂督張會奏

奏爲黃河造橋於河防並無窒礙遵

旨籌議恭摺覆陳仰祈

聖鑒事竊照光緒二十九年八月初五日承准外務部
咨光緒二十九年七月初五日准軍機處鈔交河南巡
撫張人駿奏黃河鐵橋建造不易一摺奉

硃批著袁世凱張之洞盛宣懷妥議具奏欽此仰見

聖明路政河工權衡並重之至意欽服莫名當經

臣宣

懷札飭盧漢鐵路洋總工程司沙多查照原奏詳核議
復去後茲據沙多稟稱如原奏稱沙鬆土疏立根不牢

可慮一節查黃河沙鬆土疏係指浮面一層而言泥沙之下皆有實地建橋之法首在察看實地就造橋之處上下數里之內處處打鑽其鑽入地深至八丈卽知地質若何情形各國海口建築碼頭水深數丈至十餘丈尙可用空氣下水以求實地黃河之水秋冬閒深不過數尺欲求實地更易施工歐洲自刼造鐵路以來橋樑之學日新月異其河面之闊水流之急施工之難恆有逾於黃河者如下埃及之尼勒河大橋美洲之米西西畢河大橋俄國之烏魯嘉河大橋指不勝屈至希臘英吉利更有過海之橋未聞失事是黃河造橋可無慮立

根不牢矣又原奏稱地勢南高北下拖溜旁趨可慮一節查黃河造橋爲接通南北鐵路並非爲保護河工若謂治河專主以隄束水建橋則數千年無聞此指治河而言今鐵路建橋當問建橋以後有無拖溜旁趨之患原奏所稱黃河漲一灘嘴築一挑壩對岸卽生奇險況層層橋柱勢必至於流緩沙停別尋去路等語又第一節所云以數十丈鋼柱櫛比河心在急溜則激水之怒在淺灘則分水之勢盤渦挂淤全河受病等語誠以橋柱佔地太多河心容水自少必有盤渦挂淤流緩沙停之慮全摺之精意在此數言此治河之常語司工程者

豈有不知請略言建橋之法則可以釋然矣今所擇建橋之地在南北兩岸從未泛濫而河道亦未更改之處自鐵路開辦以來卽派有專駐該處華洋人員逐日丈量河水之漲落測勘溜勢考驗水痕得其要領擬造之橋不用木柱而用螺絲鋼樁防其佔地過多計所用鋼樁共佔河心法尺八十四尺再將河心開寬至法尺二千八百尺較平常最大之潮加寬二百尺除鋼樁所佔八十四尺實加寬一百十六尺不特不礙流水尙從而疏通之又何有流急盤渦流緩沙停之患哉又原奏稱黃沁交匯頂托倒灌可慮一節查工程重在測量橋工

之不礙流水既已考求精審就沁河而言沁匯於黃卽在橋之上游距橋約二十四華里左右沁河地勢測準較黃河高法尺二尺五寸約合華尺八尺五寸何至因建一橋黃河之水卽能倒灌入沁且倒灌入丹入衛甚至入於天津耶又原奏稱凌汛暴漲水能漫橋可慮一節查黃河凌汛固屬喫重然考之西彼利亞大河並北美洲大河之凌汛更十倍於黃河該處每年河凍逾六月鐵橋林立未聞於凌汛之時致生險患今擬建之橋橋面高於極大潮汛華尺一丈而高於該處隄岸三尺有奇倘凌汛漫及橋面必先漫及隄岸查榮澤廣武壩

爲數百年來未聞漫溢之處所以必於此建橋者誠非漫然爲之也至原奏稱建造浮橋多造渡船路經黃河易車而舟亦無甚耽延等語此不明路政之言也夫盧漢鐵路正欲聯南北兩端爲一氣倘中間易車而舟廢時糜費又何貴乎鐵路況當夏令水漲流急輪駁均不能行秋冬河又半涸南北客貨乘火車至河干須舍火車而用騾車將至河心又須舍騾車而用渡船阻礙尤多若用浮橋則成於秋冬毀於春夏仍失通行之利更無如此辦法總而言之黃河固河之大而險者橋工亦工之距而難者若不審河勢不驗地質不諳水工貽害

何可勝道今選派專門工司測量地勢上下數十里考驗地質打鑽八九丈前後十餘次歷時四五年方擇定建橋之處繼又特請諳練橋樑工程之大工師潛心考究詳之又詳橋圖乃定斷無庸疑慮於其間也且比公司名利攸關非計出萬全萬不肯輕舉妄動等語臣宣懷當卽移會臣世凱函招英國工程司金達來津將沙多復稟令其核議並飭前往復加勘驗據金達復稱沙多議復各款已屬言之極詳卽使親履復勘以一時之閱歷仍不如沙多數年之講求較爲精核且所云名利攸關斷不肯輕舉妄動尤爲極中竅要之言似毋庸再

往復勘等語

臣

之洞於本年二月回任後復經派委湖

北道員寶豐馳往鐵橋工次周歷勘驗茲據該道覆稱
勘得黃河鐵橋南起廣武山麓北達姚期營之下游數
里許橋身長八百五十餘丈中用鐵墩爲基統計一百
零三墩南北幹各二十六墩均以六柱爲一墩居中五
十一墩均以四柱爲一墩六柱之墩兩墩相距八丈八
尺五寸四柱之墩兩墩相距五丈九尺四寸凡此相距
之處皆係留爲流水之位於河流當無阻礙其鐵柱深
入沙土約三丈至四丈不等現南岸已修成鐵墩十六
座北岸已修成鐵墩十五座鐵柱森立每遇風急水湧

並不搖撼似不致有立根不牢之慮並於姚期營等處
建築石壩十餘道以遏水勢使歸中流是拖溜旁趨亦
可無慮至橋面高於廣武壩一丈有餘廣武壩從未淹
及則凌汛斷不致漫橋可知橋距沁河二十餘里現在
展拓河身所留水位甚寬既未減小河身容水之量自
可無虞頂托倒灌之險等語臣等伏查盧漢鐵路初造
之始卽深慮黃河橋工成之非易並恐有礙河防先經
臣宣懷厯派德國工程司錫樂巴美國工程司李治法
國工程司道理懷意國工程司海沙地先後履勘皆稱
黃河必宜造橋且所擇之地亦與沙多相符蓋橋工爲

南北鐵路樞紐若不建橋與無路同若建橋之後有礙河防萬一拖溜旁趨河或改道與無橋同故建橋之議歷各國著名工程司詳審而後定不敢不慎也今原奏未然之慮自以建橋之後全河受病爲最重其言橋工之不易則云沙鬆土疏又淩汛則水能漫橋竊就兩者兼權橋成後全河有無受病應以造橋是否有礙河身爲斷橋工之難易應以橋樁能否深入土中橋面能否高於堤岸爲斷詳核沙多復稟其指陳利害之處凡原奏所慮及者皆在預防之中自古治河無善策各省築隄培埝歲糜巨帑而泛濫仍不能免若謂建橋以後黃

河從此無病誠非鐵路工程司所敢言然橋樁之無礙
河身造橋之可以立腳而極大之汛又不至漫過橋面
沙多之言證以英工程司金達所議及道員寶豐覆勘
情形似尙切實確有把握至以隄束水治河者皆知之
而不知河之有橋亦具束水之力故凡橋口之水其流
必迅所謂流迅則勢猛勢猛則新沙不停舊沙盡刷河
亦愈深原奏雖非指建橋而言似亦實賅此義此沙多
所未及言臣等揆情度理反復思之似建橋之無礙河
防彰彰明矣要之鐵路爲新政大端橋工尤爲南北關
鍵就黃河而言爲非常之創舉就鐵路而言爲必蒞之

要工臣等固不敢膠執以貽橫決之憂亦不敢遷就以罷垂成之議數月以來往返函商意見悉同所有黃河造橋於河防並無窒礙遵

旨籌議緣由是否有當謹合詞恭摺具陳伏乞

皇太后

皇上聖鑒訓示再此案因飭議函商均需時日是以復奏稍遲合併聲明謹

奏 六月二十三日奉

硃批依議欽此

賞袍袷料普洱茶謝

恩摺

光緒三十年九月

奏爲叩謝

天恩仰祈

聖鑒事竊

臣

於本年八月二十日接准京函仰蒙

恩賞袍袷料普洱茶等件到

臣

謹卽恭設香案望

闕叩頭謝

恩祇領伏念

臣

猥以疏庸曾無報稱迭荷因時之

寵賚益慚逾分之叨榮

錫賚自天悚惶伏地欽維

離明月滿

愚齋存彙

卷十

奏疏上

七

思補樓藏版

乾照秋高

黼座宵衣奄八紘而挾纊

衢尊菲飲台百辟以含和

臣

綦組未施祥琴將屆覩藻

采而滋怵惕藉甘芬以滌煩醒美錦知裁倍懷鵷濡之
詠新綱利用旁參鴻漸之經願祝

文經武緯之謨被於遐服更沐

堯醴舜醇之化飲以太飭所有

微臣

感激下忱謹繕摺

叩謝

天恩伏乞

皇太后

皇上聖鑒謹

奏 本年十一月二十四日奉

硃批知道了欽此

賞壽字如意蟒袍佩件謝 恩摺 光緒三十年十一月

奏爲叩謝

慈恩恭摺仰祈

聖鑒事竊 臣於本年十月初十一等日先後蒙

恩頒賞壽字如意蟒袍佩件並江綢袍褂料普洱茶於

十一月初一日由差弁贐回到 臣當卽恭設香案望

闕叩頭謝

恩祇領伏念 臣猥以疏逖歷荷

殊榮循分撫衷涓埃未報欽維

慈闈篤祐

唐肅存彙

卷十

六

壽寓延釐

萬年晉長樂之觴

袞袞舞綵九節協從心之矩

若玉鏘華

魏煥天章

鳳藻灑蔚藍一色燐煥雲錦龍團襯煙雨雙芽凡茲

中禁之隆施悉本

深宮之錫類充閭光耀舉室懽忻

臣

心切葵傾躬依華

祝愧鮮粟絲之獻迺叨

文綺之珍被服未堪指揮乏術對垂蒼珩摹仙籙以書

紳半茁青旗注泉經而紀瑞詠長慶而普天同慶願陳
箕範九五福之疇際小春而大地皆春遙上

璇室億萬年之頌所有微臣感激下忱理合恭摺叩謝

慈恩伏乞

皇太后

皇上聖鑒謹

奏 本月 日奉

硃批知道了欽此

葡國商約畫押進呈約本摺

光緒三十年十二月直督袁鄂督張商約大臣呂

會奏

奏爲葡萄牙國商約定議遵

旨畫押謹將約本恭摺

進呈仰祈

聖鑒事竊

臣

海寰

臣

宣懷於本年二月承准外務部咨

開據葡萄牙國駐京使臣白朗穀照稱奉本國諭改修稅則一事派該使臣前赴上海畫押並將光緒二十八年九月所訂之新定增改條款暨是年十二月所訂之會訂分關章程條款內之意同語異之處改爲一律其

修改稅則及新定增改條款並會訂分關章程條款合訂一本以歸畫一該使臣擬於二月上旬赴滬請轉行知照等因當於該使臣抵滬後訂期與之會晤面詢照會內所稱各節將何者爲意同語異及如何改歸一律之處詳爲解明以便會商辦理該使臣始聲明因光緒二十八年新定增改條款及會訂分關章程條款該國議院未經核准不克互換是以此次修改商約另行擬送條款卽將前次條款章程意同語異之處包括在內臣海寰等以該使臣晤對之詞與照會外務部文意不符卽經駁拒不議並備照會詰問該使臣令其明晰照

覆旋據覆稱前奉本國訓諭業在外務部面行聲明一
本國政府准議院所議給權於駐華公使新立商約卽
照近日各國與中國所立之商約無異二現欲請立新
約包括光緒二十八年九月所立之條款暨是年十二
月會訂之專條但內有更改者俾中葡兩國主權免有
視爲關礙之處三至於葡國協助中國防緝走私洋藥
一事奉本國政府訓諭可將此項緝私之法整頓以便
全免走私四因今欲立之新約應包括光緒二十八年
九月所立之條款並十二月所訂專條內之宗旨或係
更改或係推廣悉行包括在內所以本國之意毋庸將

前約核准各等情前來又經電詢外務部覆云該使臣並未向部聲明前約作廢當日議約原以分關鐵路爲彼此互換利益儻不將光緒二十八年之約核准藉包括爲詞以廢分關之議則中國亦必將鐵路互換之照會聲明作廢經臣海寰等照電直告該使臣堅持許久屏不與議該使臣迭來商懇以澳門設立分關實有礙於該國主權故議院未能核准欲明言前約作廢又有礙於該國體面故以包括宗旨毋庸核准爲詞臣海寰等復細繹前定分關之約第三第四兩款載明係爲稽查澳門出入口運入中國各埠洋藥稅餉起見原以澳

門協助中國徵收洋藥稅釐早經立有專約其權仍在
澳官中國海關稅務司並不能過問用是議在澳門設
立分關今因格於議院寢而未成該使臣照覆既經聲
明奉該國政府訓諭可將此項緝私之法整頓以便全
免走私果能將緝私辦法切實妥擬得收成效未始不
可稍予通融辦理電商外務部及臣世凱臣之洞意見
相同該使臣復電駐京參贊赴外務部再三陳說並託
英使爲之轉圜外務部始允電致臣海寰等彼此和平
商訂因與該使臣首先議定須將稅則及現議商約並
緝私一切詳細章程暨鐵路合同一律妥訂後

奏奉

允准卽同日畫押以爲互相鈐制之計此商約未經開
議已再三辯駁之情形也嗣據該使臣陸續開送商約
款文二十條一面鈔寄外務部及臣世凱臣之洞察核
一面由臣海寰臣宣懷摘其萬不能允者兩條一爲中
國所有土產食物由各埠轉運澳門專備該處居民所
需者一概免納各項出口之稅一爲中國土產貨物於
出口時如將正稅完清若運入澳門將來轉運中國地
方於復進口時應完稅項與通商此口轉運彼口者一
律辦理先行駁刪該使臣初未首肯並以澳門食物免

稅一條爲前訂分關章程內所有與我力爭駁以前約
旣未作准卽可由我增減且此兩條均於稅務大有關
礙深慮奸商藉此影射偷漏他埠從而效尤再四辯論
強而後可又寓澳華民請每年准運米六十萬石免納
稅課以資食用如將來此數實不足充寓澳華民之所
需則可將數加增一條嚴駁力拒該使臣以民食所關
爲彼政府注意之事堅請不已相持數月極意磋磨彼
始允不入約文擬照日本成案改用照會存查電商臣
世凱臣之洞往復籌酌並電兩廣總督查復旅澳華民
不過八萬約需食米二十四萬石核與臣之洞前在粵

督任內札行司局各案酌定米石出洋多寡不甚相遠
又與該使臣駁減米數舌敝唇焦該使臣始減至四十
萬石電經外務部酌定每年准運三十萬石臣世凱
之洞亦以此數不能再有加增臣海寰等復與譬說百
端堅執到底該使臣見我不肯鬆勁然後就範並照臣
世凱電屬於照會內多立限制指定在廣東省購運儻
值該省荒歉始准赴他省不禁米出口之口岸購運每
年由兩廣總督發給米照三十萬石年終將用贖米照
於次年正月繳銷換給新照以免補運此外各款與英
美日各約相同者九條於意義稍有出入增損之處詳

加酌核悉令改歸一律首尾例款四條爲議約所應行
聲敘亦與酌改妥合其餘爲該國所特請者五條又奉
外務部電令添入限制華民冒入洋籍一條該使臣以
此事可將情形敘入照會由該國酌辦不願入約經臣
海寰等詳與辯論甫允照辦並將英美日約所有之整
頓國幣一條爲該約所無議令增入綜計釐訂條約二
十款第一款聲明舊約照舊遵守第二款聲明和議所
定加增稅則葡國允遵照辦第三款聲明入澳門洋藥
均固於官棧每年澳門食用洋藥定數以外不得再有
搬出凡報運中國各處亦應設法以防私行運往所有

應定各項章程應由彼此兩國商訂又葡國迅定律例如有犯此約章應分別懲處第四款澳門水陸地方應如何防緝走私彼此派員會同訂明查緝之地方並可行之辦法第五款照英約推廣西江各口及廣州府屬各埠行輪惟須遵守現行一切章程如不遵守仍不准照辦葡國並定律例分別懲辦第六款葡萄牙酒無該國執照不得照本約所附稅則納稅第七款通商口岸地方居住貿易第八款華人入葡國版籍須專定律例杜其在內地所享利益及藉葡籍以脫卸在華所立有合同責任第九款加稅免釐第十款發還海關存票第

十一款釐定國幣第十二款禁止莫啡鴉第十三款振興礦務第十四款合股經營第十五款保護貨牌及創藝執照第十六款整頓律例第十七款籌安民教第十八款條約年限第十九款本約以英文爲準第二十款在北京互換以上各款爲我所側重者在洋藥緝私一事該使臣立意約文以渾括爲準免致議院再有疑阻商酌至再將詳細辦法另立專章計釐定第三款專章五條大旨在洋藥運至澳門必須國入官棧其由棧報運中國則由彼此會同稽查必須完清海關稅釐始准搬出如不進官棧私自登岸按葡律核辦其由原船私

運中國由拱北關緝辦並嗣後有應行商酌加添由葡官與稅務司商訂第五款專章十五條在澳門專設躉船以便由拱北關查驗由澳門來往各處貨物爲要義其一切限制辦法悉照英約內港行輪章程核議迭經

臣世凱

臣之洞往復籌度公同斟酌妥善電請外務部

核准然後與之定議至陸路稽征稅項訂明設在總車站載入鐵路合同之內又第三款澳門食用洋藥定數恐將來澳督與稅務司多少爭執意見不同特用照會聲明可由彼此在北京之代表人細查會定又籌安民教一款該使臣奉其政府訓條另備照會聲明凡有天

主教堂在華之他國已經允許者葡國始可照辦此會
訂約款章程及另備照會之情形也伏念葡萄牙國以
和約未經與議不認各國修改稅則而要素澳門分設
鐵路與粵漢鐵路相接是以外務部原議在澳門設關
以爲互換利益今該國以議院未能核准前約已不廢
而廢故此次詳訂中國海關在澳門水陸地方查緝洋
藥走私辦法權限以爲補救該使臣欲以新約包括前
約誠心相助妥訂條款章程雖無設關之名可收緝私
之實並由臣宣懷與該使臣將粵澳鐵路合同督同兩
國商董妥議將車站徵稅一條列入合同之內電請外

務部核准正擬電

奏請

旨又准外務部電開接廣東督撫電據廣東紳商公稟以粵本係缺米之區籲請勿允葡運粵米情詞迫切不能不俯順輿情令再磋商葡使等語適該使臣已奉其本國政府訓諭令速返國不能再候米事既須更議恐不能卽時商訂遂擬將商約暨章程先行畫押卽經會電具

奏於本年十月初一日奉

旨著呂海寰等就近畫押欽此該使臣以原請購運食

米本未指定粵省旣民情不順可由他省購運儻一概
不允則商約章程皆行作廢詞氣決絕憤形於色堅請
給予憑函卽經電奉外務部示復憑函措詞亦要斟酌
又切囑勿誤商約畫押復與葡使切商告以中國產米
省分無多粵省如此他省民情何如尙不可知必須由
外務部電商方能酌議該使臣謂彼此已意見相同請
將我之照會酌改聲明俟外務部與產米省分各督撫
詳細商酌辦法容後與駐滬葡總領事議定以爲准其
運米之據臣海寰臣宣懷以畫押期迫非空言所能就
範該使臣旣允緩定辦法姑如所請給予照會將來尙

可從長與議業經電達外務部在案

臣海寰

臣宣懷遵

卽繕備漢文英文葡文約本章程各二分派隨辦商約
內閣侍讀學士劉宇泰候補四品京堂李經方道員楊
文駿梁瀾勳洋員賀璧理戴樂爾與該使臣所派譯員
互校復將洋文寄請外務部覆核無異訂期十月初五
日將商約章程並稅則暨

臣

宣懷與該使臣另議粵澳

鐵路合同在上海同日分別畫押鈐印彼此各執一分

除稅則附片陳明鐵路合同由

臣

宣懷另案具

奏外所有葡約完竣遵

旨畫押緣由理合合同恭摺具報並將約本章程漢英

葡文各一分照案齎送軍機處

進呈

御覽伏乞

皇太后

皇上聖鑒訓示謹

奏三十一年正月初六日奉

硃批外務部知道欽此

俄義丹法瑞葡稅則續行畫押片

光緒三十年十二月
直督袁鄂督張商

約大臣呂會奏
再臣等先後奉

命辦理商稅事宜卽准英美日三國派專使來滬暨德
法等國所派駐滬總領事官會同臣等所派隨辦商約
之稅務司按照和約大綱第六款將進口稅則改爲切
實值百抽五並酌議修改稅則善後章程三條附列稅
則之後因美國專使卽欲回國催請先行簽字經電請
外務部代

奏奉

旨派

臣

海寰

臣

宣懷畫押當時會同畫押者爲奧斯馬

加國比國德國英國日本國和國日國美國惟法國須
請示本國政府是以未畫此外各國尙未派員前來謹
先將已畫稅則咨送軍機軍處代爲

進呈於光緒二十八年七月會同

奏報奉

硃批外務部知道欽此欽遵在案嗣准俄國義國丹國
瑞典那威國先後派員來議僅俄義兩國以該國出產
貨物尙有未經載入新改稅則者開單送請核議復經
派原議稅務司與之商定並知照先經畫押各國均允

行無異復據法國駐滬總領事以奉其本國訓條謂所
議稅則雖經各國專員議允間有定稅較重者尙須修
改又經與之再三議駁酌允四條改爲按每值百兩抽
銀五兩不先行估價不預定稅數以免喫虧又葡萄牙
國前以和約未經與議不認各國修改切實值百抽五
稅則經臣海寰臣宣懷迭次開導此次議訂商約亦允
遵照辦理現已次第畫押完竣綜計有約各國尙餘巴
西秘魯墨西哥三國至今尙未派員據隨辦商約稅務
司申稱查該三國並無往來中華之貿易商定稅則與
否無所出入謹將續行會同俄義丹法瑞典那威葡萄

牙六國畫押稅則照案咨送軍機處謹附片陳明伏乞
聖鑒訓示謹

奏 三十一年正月初六日奉

硃批知道了欽此

日本贈送寶星應否收受請

旨片

光緒三十年十二月
直督袁鄂督

張商約大臣呂會奏

再_臣等前據日本駐滬總領事小田切萬壽之助面稱

此次新訂條約中日辦事各員彼此均應各贈寶星以

昭睦誼並已將_臣等銜名兼索隨員名單開報本國旋

據該總領事將日本在事各員名單開送由_臣等於本

年五月十九日會同奏請

賞給寶星六月初六日奉

硃批著照所請外務部知道單併發欽此嗣准外務部

將製就寶星並繕執照咨送_臣海寰_臣宣懷轉交該總

領事祇領分別轉送取具回文咨部查照各在案茲由駐京使臣內田康哉暨駐漢領事永瀧駐滬總領事小田切萬壽之助將日廷贈送寶星分別照送前來當卽請示外務部函令自行開單具

奏請

旨遵行相應照繕清單恭呈

御覽應否

准予收受謹附片具陳伏乞

聖鑒訓示謹

奏 三十一年正月初六日奉

硃批著准其收受單併發欽此

廣澳鐵路議訂中葡合同摺

光緒三十年十二月

奏爲廣澳鐵路遵照部示議訂中葡商辦合同條款就緒恭摺仰祈

聖鑒事竊

臣

疊次承准外務部咨中葡鐵路公司建造

由澳門至廣東省城鐵路業於增改中葡條約案內准

其訂辦飭

臣

與該公司議立合同並函示訓條以華洋

合辦之局必須扼定商辦不與兩國國家相涉爲第一

要義行令妥商籌辦前來時葡使白朗穀來滬會議商

約帶同葡商伯多祿併議鐵路所遞條款應駁甚多

臣

以路屬商辦由商部遴招華商與議方合體格旋接部

電仍責

臣

籌議適有粵商林德遠呈請認集華股與葡

商平權合辦當卽查照部示與該使逐款磋商計廣澳

鐵路應需資本華商葡商各認一半公司權利悉遵

欽定商律葡國國家不能干預應築軌路繪圖呈候核

准方可開工每段工竣由兩廣督

臣

與澳門總督議定

該段抽收稅則方可開車按照商路機器材料照納關

稅官地民產概給租值鐵路進項除養修費用分給商

息外每年另提公積百分之三拔還本銀再有盈餘以

三成歸中國

國家本銀逐年清還中國卽可收路毋庸議價造路工

程司參用西人餘均華籍總以不越中葡兩國人爲斷
聲明中國不代擔保本息該公司設有倒欠及帳目糾
葛兩國國家均不干涉亦無賠償所有議訂合同各條
飭由隨辦商約候補四品京堂李經方鐵路參贊候選
道陳善言等與白朗穀數月磋磨並由臣逐條斟酌電
請外務部詳加核改因葡使堅執與商約一同簽字接
准部電修改各條尙屬妥協飭臣先與簽字隨後專摺
奏請

訓示綜計細目三十一條凡扼定商辦宗旨不與兩國
國家相涉之要義似尙足以預杜枝節自保利權除將

簽印合同咨送外務部並分咨商部兩廣督撫臣查照
外理合將遵訂中葡公司廣澳鐵路合同底稿繕具清
單恭呈

御覽俟奉

旨批准再飭由華商林德遠葡商伯多祿另訂公司創
辦章程呈候酌核再行開辦所有議訂廣澳鐵路合同
緣由謹恭摺具陳伏乞

皇太后

皇上聖鑒訓示謹

奏 三十一年正月初六日奉

硃批外務部知道單併發欽此

奏調李經方片

光緒三十年十二月

再鐵路總公司責任繁重用人尤難自開辦以來盧漢鐵路分作南北兩段南段總辦先派道員鄭孝胥現派湖北候補道錢紹楨兼行車監督北段總辦係派直隸候補道孫鍾祥兼行車監督現添派前直隸候補道陶湘會辦行車監督兼辦長辛店機器廠駐漢總稽核前派道員吳宗濂魏瀚現派候選道鄭清濂附屬之正太枝路總辦係派直隸候補道潘志俊粵漢鐵路按照合同應設總管理處先派道員陳善言黃開甲爲總理嗣因黃開甲赴美改派同知王勳代理廣東總辦先派道

員張振勳楊樞旋卽升擢改派廣東候補道李準並派道員鄭官應接辦購地現已裁撤僅留溫宗堯爲行車監督滬甯鐵路現派直隸奏留山西補用道沈敦和候補道朱寶奎爲管理處總理並派江蘇候補道林賀峒爲購地總辦萍潭枝路派湖南候補道薛鴻年爲總辦以上各員皆由臣與該各省督撫臣會同檄委總公司爲各路提綱挈領之處漢文參贊前派知府何嗣焜現派候選直隸州知州楊學沂法文參贊係派候選道柯鴻年英文參贊係派候選道陳善言等造冊處前派道員鄭孝胥現派廣東候補道王存善知縣邱瑞麟通判

沈喆孫等各司其事均能力任艱鉅晝夜辛勞現今盧
漢鐵路及萍潭枝路將次竣工正太已經興築亟須遵
照部章繕辦表冊分別咨核粵漢正議廢約滬甯甫經
開辦臣輕材任重隕越時虞現值盧漢將成尙未告竣
之前暫不敢遽求卸責惟總公司人員如鄭孝胥楊樞
張振勳魏瀚黃開甲等皆係有體有用之才先後多經
擢調現在當差各員雖能各稱其職然每遇艱難叢集
之秋常有乏材之歎蓋借款造路處處與洋人交涉心
力交瘁勞怨難辭非具有堅忍不拔之操鮮能始終其
事查有候補四品京堂李經方此次隨臣與葡使白朗

穀議定中葡廣澳鐵路合同條款悉中竅要其於交涉要務歷練已深自有心得現隨_臣等辦理工商約合無仰懇

天恩准令李經方兼在鐵路總公司隨_臣辦理一切俾收得人之效理合附片具陳伏乞

聖鑒訓示謹

奏 三十一年正月初六日奉

硃批知道了欽此

賞袍褂料普洱茶謝

恩摺

光緒三十一年二月

奏爲恭謝

天恩仰祈

聖鑒事竊

臣

於光緒三十年十二月二十七日接准京

電欽奉

恩賞江綢袍褂料普洱茶等件謹卽恭設香案望

闕叩頭謝

恩祇領伏念

臣

欣逢

慈壽疊荷

珍頒方深舞蹈於

慶辰又沐

寵榮於年例自

天錫賚伏地慙惶欽維

凝績履端

斟元泰始

舜展煥衣裳之治化洽熙春

堯階呈蓂莢之華香清函夏

闔澤覃敷於挾纁陽和普逮乎分甘

臣

歲琯虛更祥琴

候屆撫紳垂而書訓鵜翼方歌嘗勺飲而思源龍圖乍

試遙拜

芝綸文綺憶

中天冬日之溫如聞

朶殿芳馨占

上苑春風之瑞所有

微臣

感激下忱理合恭摺叩謝

天恩伏乞

皇太后

皇上聖鑒謹

奏 本月

日奉

硃批知道了欽此

愚齋存藁卷第十